

# Táitási

*Ísu wíyómpa'a iyówana Póro moórá-waai úmai sísamaifakemba afa'móráe-aataiya'iyó miyáumai-aatai maisuwéna Táitásin-imayaa éna maanáái agaimái tuwówana wenópa'a kuráiyé. Ísun-aaí simátíma'mae iyúnkakemba ándáfa'a ánkárowana ména Táitási Kírítí-marafa'o Fasi'aénkóní waásiya'o káráwiyontafena imáyáa éna maanáái agaimái tuwówana wenópa'a kuráiyé.*

**1** <sup>1</sup>Táitásiyo kemá Póro moórá-aaí sénaumpo isaaó. Kemá Maníkóní kísau-waasi é'a Ísu Káráísitini aantá-waasi-i'a uwásinkena si'mákaiwai úne. Maníkómó wemparí'o úmakain-kwaasi timankúnkúmba úmae wéiyesa érai'-aaí ísámae wéiyesa Maníkóní aampa'ó wéiyontafena Ísu Káráísiti mináái simátimiyo séna si'mákaiye. <sup>2</sup>Naaófá'á Maníkó ímbo karo'ó siwái érai'-aaí aantembo siwái óraaka séna kemparí'o úmaraunda-waasi aú'fa úmai maé'mae'a ónááwe súwata érai'-aaín-iyé séta méraumne. <sup>3</sup>Maníkómó imáyáamo urón-kanáa tínena úwana Ísu Káráísiti wenáái simátimuwana Maníkó simásimena séna kesáái simátíma'mae iyuwó séna kentáásí sáwí-imayaafinkentaamo faúsínkáíwaisa mináái siyáiyé.

<sup>4</sup>Táitásiyo maanááímá maanáúfáíffimbá agaimaráúmpo isaaó. Ísu Káráísitinka'o simankúnkúntaamo úndantemba emá miyá éma érai'a kesááninkaamba ómpo isaaó. Maníkó kentáásifowawe Ísu Káráísiti kentáásí sáwí-imayaafinkentaamo faúsínkáíwaiye úwoi áwa'nai esarai faru uwánkaayantafe'a inái súné.

**Táitási Kírítí-marafa'a koména kisaumo maiyáin-aaí.**

<sup>5</sup>Esékaima Kírítí-marafa'a komékai embá auwé'a kenkáísí kísau ímba taí'áronka'a embá auwé'a tiyáumne. Minkísáú kawé'ó indasáfé'a embá auwé'a simáme sé'a seyaafá'-náópa'a Maníkóní waásiti óraa'-waasi íyáfasintinkafa'a wínone sé'a auwé'a tiyáumne. <sup>6</sup>Íyáfasintinkaan-kwaasi maarán-kwáásín-owe. Miwífimbá ímba sáwí-aaimo wéráiwai ésa kímbora-inimba mapá kuráawi owasá miwítí iyámpói maarán-iyámpóín-owe. Maníkón-aaísafesa timankúnkúmba íyasa kawé'-iyámpóín-owe sen-iyámpói ésa tinófoi-taai ísááwin-owe. <sup>7</sup>Maníkóní waásiya'o

káráwiyowi Maníkóní kísaura'a káráwiyomba pása maarán-kwáásín-owe. Miwífimbá ímba sáwí-aaí wéraiwei ésa kesáái iyáákainkwaé ímba sewí ésa ímba ááéma aaisambó sewí ésa ímba uwóí'o on-dómbá námae nésa uwóí'a owí ésa ímba aaisambó sewí ésa óntantafesa ímba túrande-urande owí ésa <sup>8</sup> namu'-waasi naané tóné timésa owí ésa seyaafá-káwé-tántáátáfésa aamoí owí ésa kawé'-ímáyáá owí ésa arupíse úmai méraawi ésa Maníkón-arááímo wéwaewi ésa miwí túma kawé'-úmai káráwiyowi ésa Maníkóní waásiya'o káráwiyowi miyán-kwáásín-owe. <sup>9</sup> Maníkóní érai'-aaimo simámakaunda-aaí fasi'ámai ta'óto'maesa iyóro. Miyámó ésamo ésa érai'-aaí kanaa'á simátimesa fasi'átinkanaafo miwí tááisafesa karo'-ááín-iyé sewí-tááigomba iyáákanaawe.

<sup>10</sup> Sáwífa'-waasi kawé'-áái ímba wéraaiwaesa úwoi sáwífa'-aaí símae wénesa miwífinkémbá Yúndaa-waasi sáwífa'-waasi miyá ésa karo'á simátinkesa <sup>11</sup> óntamba maénae sésa karo'-áái simátimesa tuwímbai-akumba sáwí'a uwátinkesa sáwí'a wéfo mináái aambá fáitinkaa. <sup>12</sup> Kírítí-waasifinkemba moóráwigo kawé'-ááímó siwái séna Kírítí-waasi aasiyaasi karo'-áái sésa afáá'-wái-wáámbó ontembá sáwí'a úmai kafóná'-í'a úmai mésa sáwífa-tomba náma'nama'a wéowe siyáíye. <sup>13</sup> Siyáín-aaí érai'-aain-iyé. Mindásafe miwí-ímáyáá fasi'ámai arupíse uwátinkénasa Maníkón-aaí kawé'-úmai arááíwaesa <sup>14</sup> Yúndaa-waasiti maní'-áái ímba isésa érai'-aaimo taráíyaawi-taai ímbo isáfyamba ifátúwáaro. Miyá íyantafe miwítí ímáyaá arupíse uwátinkaa. <sup>15</sup> Ímáyaá kawé'-aantembo owí seyaafá-tántáátáfésa ímáyaá ombá kawé'-ímáyáá aantemba wéfo ímáyaámo sáwí'o owí Maníkón-aaimo taráísón-kwaasi miwítí ímáyaágo sáwí'a isaná tirumpimbá karo'-áái wéraisasa pása seyaafá-tántáátáfésamo ímáyaámo ombá ímba moórá kawé'-ímáyáá wéowe. <sup>16</sup> Miwí tóikakemba karo'á sésa Maníkón-aaí arááíwaumne wésefo sáwí'-aantemba ésa kawé'-áái taraisésa ímba kanaa'á kawé'ó ombá miyáumai méraawini áwáuma Maníkómbá tínaaeni'a wéowe.

### Ásé-aaí arupíse úmai simátíma'mae iyuwómó siyáín-aaí.

**2** <sup>1</sup> Táitásiyo ásé-aaigoni áwáuma érai'-aaimo simámakaunda simátíma'mae iyuwó. <sup>2</sup> Waurántómbá simátíme sé ímba uwóí'o on-dómbá námae wéne'a uwóí'a wéle'a arupíse úmai mé'a kentúra'a káráwimai kawé'á é'a Maníkón-aaisafesa timankúnkúmba é'a fasi'ámai mé'a ímáyaá timé'a fasi'ámai méraiyana ímba tuwesaraí íno simátimiyo. <sup>3</sup> Áráankantomba simátíme sé Maníkóntáfé'a ímáyaá é'a ímba tíyo-aaí wése'a ímba uwóí'o on-dómbá námae wéne'a uwóí'a é'a aú-inimba kawé'-ámbá aráátíméro simátimiyo. <sup>4</sup> Miyámó íyasamo ésa aú-inimba minkáwé'-ámpá'á wésa tuwaai'wainé tiráá'marine tirumbá timésa <sup>5</sup> túra'a káráwimai kawé'á ésa kawé'-aantemba ésa tuwaai'wainká'é tiráá'marinka'e naanka'é kawé'-úmai káráwiyesa tuwaai'wain-táái isanááwe. Miyámó íyasamo ésa tuwánésa sésa Maníkón-aaí kawé'-ááín-iyé sénááwe.

<sup>6</sup>Ifó'-wáásísómbá óraaka simátíme sé kentúra'a káráwimai kawe'án-oro siyó. <sup>7</sup>Seyaafá-tántáá'á kawe'á inasá awánésa emó indantembá miwí miyá íya simátíma'maemo íyínda ímba óikaken-aantembo simátímínda arumpinkénkwárá'á simátimiyo. <sup>8</sup>Kawe'-áái aantemba simátímínasa karo'-ááín-íye sésamo karo'-ááímó saafá íyanamo éna ímba wérainasa tigasáfésa ésa ímba símai sáwíta uwásinkanaawe.

<sup>9</sup>Wayó-kísáúmó máén-kwaasisafe maanáái simátimiyo. Káráwiyaan-kwaasi-taai isé'a aamoí uwásinkaiwae sé'a kawe-kísáú wémae'a miwísáfé'a ímba anondáá seró. <sup>10</sup>Miwítí moparáwímbá ímba umémbá é'a kawe'-aantembo íyamba tuwánánáawe sé miyán-áái simátimiyo. Miyámó íyanamo éna Maníkón-aaí kentáásí sáwí-imayaafinkembo faúsínkáín-aai go óraa'a íníye.

<sup>11</sup>Maníkó úwoi súwa'nai enasa Ísu Káráísitimba ai'marówana fí'o-fi'on-kwaasi miwítí sáwí-imayaafinkemba faútinkaindasafena marapá'á kunkáimba póna <sup>12</sup>Maníkó úwoi súwa'nai enasa kawe'-ámpá'ó konda-ántá aráásímakaiye. Minánkó maarán-íye. Maníkóntáfésa ímba imáyáa owí sáwí'o ombá sínaaeni'a uwátimeta marapá-tántáátáféta sirááísafeta úndasa sínaaeni'a uwámeta marapátáámó méraundara'a kesúrata káráwiyeta arupíse úmai méta Maníkóntáféta imáyáa éta méta <sup>13</sup>amu'maréta Maníkó fasi'aénkwáráwíyé Ísu Káráísiti kentáásí sáwí-imayaafinkembo faúsínkáíwaiye sáwara'o paápé íyantafeta timu'maréta méta paápé íyan-kanaa sirunkósá kawe'á íníye. <sup>14</sup>Ísu kentáásí sáwí-imayaagomo ta'ótokaimpinkemba faúsinkenasa kawe'-wáásí-í'a uwásinkenasa wení waási-i'a uwásínkáíwaisa méta kawe-kísáú maénae séta méraundasafenasa mindásafenawe séna Ísu Káráísiti pukáíye.

<sup>15</sup>Táitásiyo mináái simátíme Maníkóní fasi'aéntámbá miwítí imáyáa kawe'á uwátínkénana aaí ímbo isáiyawi mináái go tirumbá waeráínasa aaí isáaro. Sinda-áái ímba isáafainifo óraaka simátimiyo.

**Maníkóntáfé'a imáyáa é'a arupíse úmai  
méraaro simátimiyomo siyáin-aaí.**

**3** <sup>1</sup>Táitásiyo Fasi'aénkóní waásiya'o káráwiyaandawi ómpo maarán-áái simátimiyo. Marapá-kísáúrá'ó káráwiyaan-oraa'-waasi tísamaifimba mé'a miwí táái isé'a kawe-kísáúsáfé'a to'mayaa úmai amu'maré'a mé'a <sup>2</sup>ímba karo'á símai sáwí'a uwátinke'a ímba aaisambá sé'a faru úmai mé'a seyaafá'-wáásí kawe'-áái aantemba sé'a méraaro. <sup>3</sup>Ááéma sáwí-imayaawara'-waasisa méta aaí ímba iséta sáwí-ampa'a wéweta sáwí-tantaatafeta sirááísafeta éta méraawananasa misáwí-tántáákó ta'ótorowata sáwí-imayaasafeta sirááísafeta éta sáwí'a úmai méta

ff'owiti moparáwintáféta súraniyamba éta síyánta uwátinkaawanasa kentáá títámba uwásinkaraawe. <sup>4</sup>Énifo Maníkó kentáási sáwí-imayaafinkemba faúsinkáíwaisa séna sirumbá uwátinkaunda pó'a túwa'nai ondá aráátimenaumne siyónka'a Ísu Káráisitimba ai'marówana marapá'á kumúwana <sup>5</sup>Maníkó kawe'-ámpátá mésinkaraiye. Kesáámó kawe'ó úndasafenasa ímba kawe'-ámpátá mésinkaraiyo arumbá uwásinkenasa kawe'-ámpátá mésinkaraiye. Nombá maisinkénasa aú'a úmai méraawanansa Maníkóní Ufaen-ámútánkó aúita uwásinkontafena kawe'-ámpátá mésinkaraiye. <sup>6</sup>Ísu Káráisiti sáwí-imayaafinkemba faúsinkáíntafena Maníkó imáyáa éna wení Ufaen-ámútánkó kentááfímbá úwoi óraa'a uwásinkáínta <sup>7</sup>póna úwoi súwa'nai uwásinkenasa séna arupíse-waasin-owe. Érai'a aú'a úmai ma'émae'o íyani'a uwátinkanaumne sisatá amu'maréta méraumne. <sup>8</sup>Mináái érai'-aain-iye. Miyáumai káráwiyaaan-kwaasi-taai isésa kawe-kísáú wémaesa méraaro.

Táitásiyo minááímó óraaka'o simátímínda siráái wétaiye. Miyámó inasamó ésa Maníkón-aaisafesa timankúnkúmbo owí fasi'aén-ímáyáa ésa kawe-kísáú maénááwe. Mináái kawe'-ááígó póna waási túwa'nai íníye. <sup>9</sup>Énifo úwoi-aaisafesa sáwífa'-aai sésa tíwá'náwe tinááfúísái túwí'wara'a sésa aaisambá sésa Mósesemo siyón-amaantafesa aaisambó sembá miyán-áái úwoi-aagoma póna ímba túwa'nai ínifo ánaaemba uwátimiyo. <sup>10</sup>Tuwímbaimo sáwí-aaimo símaimo tuwínkaa'-uwátínkááwimba kaumbo-kae-kánáá óraaka simátímínasamo ímbo isáiyamo e ánaaemba uwátimiyo. <sup>11</sup>Miyán-kwáásí kaéntámaimo méraawi ésa sáwí'o ombá kewará'á tuwánaawata kesááwará'á wétuwanaumne.

<sup>12</sup>Moóráwígon-awi'a Átémásina'i moóráwigo Tíkíkaasina'iyó. Moóráwígomba ai'maráanana empá'ó wíndara'a imáyáa é Níkópórisi-naopa'a kempá'á tiyó. Áú'o sínda-kanaa Níkópórisi-naopa'a méraana tiyó. <sup>13</sup>Moóráwígon-awi'a Sínási aaimó isái-wáásígóe moóráwigo Ápórosiye emá túwa'nai inasarái Maníkóní kísau maimaésarai nóyááye. <sup>14</sup>Maníkóní waási súnnda-aai simátímínasa kawe'-ímáyáa ésa kísau wémaesa umbaitántá'ó wérainda-waasi túwa'nai esa pósa ímba úwoi-kísau maésa méraanaawe.

<sup>15</sup>Seyaafá'ó kesé'o méraawi entáfésa sésa kawe'-úmai méraao wésewe. Kentáási waási Maníkómpá'ó timankúnkúmbo owí esé'a méraawi kawe'-úmai méraaro simátimiyo.

Maníkó seyaafá'-wáásí úwoi wétuwa'nai-intafe'a inai sune.  
*Kemá Póro súnnda-aai tai'áiyé.*